

杭州八旗駐防營志略

杭州八旗駐防營志略卷二十五

仁和張大昌輯

彙錄志餘

康熙三十三年奉

旨各省駐防官兵每年分班扈從木蘭行圍

皇朝文獻通考

四十五年十月選杭州駐防官員驍騎校等善射者每旗各二人從熱河行圍

駕還遣回汛四十九年四月奉

上諭江浙駐防滿洲官兵朕帶往行獵之處以苦差試之略無怨意交相黽勉是以朕心少慰以此觀之兵

在訓練之善不善耳不關乎風土也

東華錄

康熙四十五年正月奉

上諭朕昔親臨河工欲往閱下河因張鵬翮奏言斷不可往是以中止今卽去仍然不能親蒞其地則亦何事復往但河工錢糧斷不可交地方當照山東振饑之例將八旗官及部院官內有行止端正者令該旗大臣及部院堂官多行保舉派出再將江甯鎮江杭州駐防旗員亦著該將軍副都統保舉派出或副都統或協領帶赴工上其京城派出官員領戶部錢糧帶往各省派出官員各就地領錢糧帶往可派大臣

督理工程所派官員每人各給三千兩務令照三千兩工價分地開工如此始得河務速成有利民生東華錄

雍正三年五月丙辰

上諭大學士等從前年羹堯所奏事件朕所降諭旨並硃批諭旨甚多有交部者有未留交部者其前後所奏事件每有互相舛謬之處爾等行文年羹堯著將諾穆渾等帶往杭州一切年羹堯所奏事件朕所降諭旨並硃批諭旨俱著察明具奏時將伊等如何措置之處著年羹堯具奏請旨至去冬年羹堯奏請帶

往補用人員內惟侍衛查爾扈係奉旨發去之人其餘有請託年羹堯帶往者有年羹堯自欲帶往者此外亦有將督撫大臣官員子弟帶往者亦有欲作質當帶往者是以有感年羹堯之人亦有怨恨年羹堯之人著伊等各將帶往緣由請託情節並年羹堯所行事蹟聲明繕寫摺子俱交與岳鍾琪轉奏儘有不能聲明情由者俱著仍隨年羹堯前赴杭州學習高其倬之弟高其倬著令回京至於朕前歲揀發與年羹堯之侍衛俱係

皇考時所用朕左右隨侍之人特欲伊等效力軍前

黽勉勤勞並非令爲年羹堯廝役而供驅使也伊等至彼貪其貲財爲年羹堯前引後隨且爲墜鎧竟似奴僕而伊等卽甘卑賤如此卽令跟隨年羹堯前往杭州至杭州時將伊等如何措置之處著年羹堯具奏請旨

雍正十一年八月內大臣海望奏請揀旗員協辦塘工事疏稱凡修築隄必須管工人員時刻不離工所工程始得堅固臣前在浙時見旗員內尙有可用之員仰懇

敕諭浙江將軍阿里衮副都統隆昇就近選派旗員

人與在工人員一同坐守監修仍令將軍副都統協同總督等不時稽查則做工人役不致怠玩奉

旨允行

乾隆杭州府志監修土備塘自斷塘頭至李家村滿洲

鑲紅旗防禦雅森秀李家村至翁家埠滿洲鑲藍旗佐領佛寶柱翁家埠至老鹽倉漢軍正藍旗防禦董大德老鹽倉至海甯縣西門漢軍正白旗驍騎校富魁海甯縣西至九里橋蒙古正黃旗佐領桑格九里橋至東新倉漢軍鑲白旗防禦汪有言東新倉至尖山腳滿洲鑲黃旗佐

領巴金泰監修海甯縣東至尖山石草土塘滿
洲正紅旗佐領長壽海甯縣西至萬家埠石草
土塘漢軍正藍旗防禦劉志奇海塘擊要十二月二

十三日奉

上諭朕因浙省海塘關係緊要是以特命大臣前往會
同該督等相度形勢定議興修又恐在工人員或怠
緩稽遲不能即時建築特令將軍阿里衮副都統隆
昇會同該督等督催辦理近聞堵塞尖山開挑引河
已經該督等查勘數次尙欲再看再商但以行文閩
省調取善水之人試探爲辭議論紛紜終無定議全

不思海水潮汐有時若遲至潮水長盛之時如何施工且採辦石料又互相推諉舍近求遠致稽時日該督等既不努力辦理而阿里衮隆昇亦俱袖手旁觀不上緊催辦若各工內實有難以施工應奏聞請旨之事亦應及早奏明何得半年以來尙無頭緒著諭程元章阿里衮隆昇張坦麟汪漭穆克登額等速將各項工程及時修築毋得仍前怠忽

乾隆杭
州府志

十二年二月乙丑奉

上諭浙省海塘關係重大固須詳慎尤戒遲疑若總理者不肯擔承將分任者愈多瞻顧則因循草率迄無

遠圖其何以謀奠安而垂永久有程元章毫無確見
今將海塘一應工程著降昇總理令偏武前往協辦
所需文武官員俱聽揀調其運辦物料預備人夫及
給發錢糧等項仍著程元章料理應付毋得推諉毋
得稽遲

東華錄

三月總理海塘副都統隆昇等題請派

撥旗員兵丁開挖引河疏稱河莊等山東首舊
有南港灣一道柴鹵船隻不時往來今西首沙
淤者僅一十五里挑濬甚易所費甚小當同總
督商酌游移未定隨傳齊固山章京等商酌不
獨各旗員情願效力卽兵丁等俱踴躍爭先如

開挖成港自應開報錢糧倘無成效昇等情願
捐資五月總理海塘副都統隆昇奏報兩河工
竣疏稱臣等開疏中小鹽南港兩處別河先期
知會督臣程元章轉飭沿海各縣催募民夫又
揀調文武現任候選廢員及浙省紳衿各色效
力人員并旗下協參佐領驍騎校等共八十餘
員派撥號段于四月初四日開工統于四月二
十九日完竣奉

旨覽奏深爲嘉悅但觀圖畫情形惟恐復淤向後可將
暢流疏刷深廣情形不時訪問隨便奏聞

乾隆疏
州府志

乾隆四十一年杭州仁和縣慶春門外各堡蝗蝻生將軍宗室富椿督飭駐防官兵協同搜捕巡撫三寶捕蝗節略

乾隆五十八年十一月將軍寶琳以奏參杭州駐防協領咨參佐領以下各官降革勒休並註銷記名者四十餘員

上恐其有意苛求以爲見長地步

命閩浙總督長麟浙江巡撫吉慶確查密奏尋覆奏將軍寶琳平日御眾嚴明操防勤慎復密訪其所參各官輿情亦稱平允並言杭州乍浦滿營婚

嫁論財相沿成俗往往有髫年許字因男家無力納采婚嫁失時而該管章京狃於積習並不設法催辦自寶琳到任後查明各旗婚姻已定因索財而不能迎娶者數百家俱經勒限官爲完配其有孤兒寡婦惻獨無依者據實查明按月給與養贍

上嘉之

者舊類
徵初編

乾隆五十二年福建臺灣賊匪林爽文糾眾滋事六月乍浦副都統永慶奉

命帶領杭州乍浦駐防滿兵前往勦辦九月有賊數千

從南潭、蔦松等處，永慶偕廣東副都統博清額等率兵奮擊賊遁。五十三年六月，永慶奏言：派往之杭州乍浦駐防滿兵回至福建地方，內有瑚圖靈阿等五名欲雇轎乘坐，恐中途抬夫脫逃，不能行走，遂私自坐船至青龍灘地方，遭風打壞船隻，淹斃人口，奉

上諭：滿漢兵遇有征調勦捕之事，於車輛可通處，尙可准其更替合坐，以省足力。若遇山路崎嶇，車輛不能前進，祇應將軍裝行李一切雇人抬送，木人卽當步行，正可藉此習勞。其或一水之便，船

隻可通亦必須所調之兵普行下船方准其坐
乘若中途私約數人各自下船已屬非是何復
思雇橋乘坐如兵丁可以乘橋坐兜則所調一
千卽須預備抬夫二千名況駐防兵丁出征向
俱帶有跟役等亦用橋兜所屬抬夫又當再加
一倍且滿營可用橋兜則綠營屯練各兵又安
能禁其不一體乘用兵貴習勞以不能登涉之
兵尙望其衝險長驅破賊有是理乎此次臺灣
勦捕賊匪檄調各省之兵不下五萬豈不竟需
雇夫十萬以爲應付過兵之用有是理乎從前

西北兩路大小金川用兵時從未聞有此事此
必該地方違例應付以爲將來開銷地步亦未
必如數預備不過以備有轎夫一項事後即可
借此多爲冒銷之計著交部嚴加議處旨舊類
徵初編
五十九年四月將軍善德奏言杭州乍浦倚靠
兵丁度日之子女適人及養育兵娶妻前未支
給賞銀請於佐領協領名下追出補給奉

上諭善德前係甯夏協領後任廣州將軍若謂應行改
正何以今至杭州始行具奏無論此項女子適人有
年不便再行補給卽欲憐恤伊等當如吉慶所奏於

養贍孤寡空閒牧廠地租項內稍爲增添豈有將數
年未給之項著落協領等賠補之理此事善德是否
有意沽名固執已見之處著吉慶其實奏聞善德年
已衰邁不勝將軍之任著將印務交吉慶暫行署理
卽速來京候旨

嘉慶五年六月杭州副都統成明奏溫台盜匪
有一百餘幫在洋游奕七月復由驛單銜具奏
鳳尾幫盜船並艇船在洋猝被颶風擊碎漂沒
上傳諭將軍范建中曰成明日前來京陛見奏及伊前
從阿桂出兵曾在軍營繕辦奏摺朕看其奏對尙無

錯誤因諭令該省遇有關係吏治民生不公不法事件及緊要案牘延擱不辦皆當訪查明確密行具奏但祇准差人齎招不許擅用驛馬昨日成明奏溫台洋面情形係該都統差人齎奏本日忽由驛三百里奏盜船遭風之事此等地方事件自有撫臣奏報且盜船遭風擊散早經阮元馳奏亦必由杭州經過成明豈竟不知又何必多爲此奏致駭聽聞徒勞驛站實屬糊塗即使伊因從前奏過洋盜情形此時有盜船遭風之事亦應與將軍聯銜差人齎奏何得單銜驛遞看來前奉有密奏之旨未免高興見長復因范

建中老病遂日無將軍著范建中卽傳該副都統到
署面宣諭旨嚴行申飭並諭以此次種種越分本應
治罪因從前曾有准其奏事之諭且念伊係武職出
身不曉事體姑從寬免嗣後如再似此擅勞驛站干
預妄奏必當從重治罪決不寬貸嗣成明又由驛遞
據候補知府戴廷沐稟稱海風損壞艇船獲解
匪犯百餘名陸續審辦見又解五百餘名除禁
府監外並羈押大堂間隨後尙有二百餘名無
處羈禁

上傳諭巡撫阮元曰副都統成明奏該省緝拏洋盜前

後不下七八百名人數眾多儻日久分禁各處恐有疎脫阮元卽應上緊審辦毋再遲延又

諭曰成明前日由三百里驛奏盜船被風一事曾經傳旨中飭本日復據成明由驛奏拏獲洋盜名數及監禁候審情形並將戴廷沐原稟一併進呈殊屬多事而摺內清字夾片奏稱范建中病故聲明暫署印篆見已專差具奏等語該副都統如實有應行密奏之件自應專差齎遞從無由驛密奏之理至將軍出缺巡撫見在別地伊應由驛奏報今專差人遞摺可謂輕重倒置糊塗之極至洋面緝獲盜犯監禁候審皆

地方見辦之事與副都統毫無干涉何以候補知府戴廷沐於成明處率行具稟此必係成明陛見回任後朕降旨令伊有密奏之諭藉此誇張冀圖恐嚇地方官吏令其將地方事件向伊具稟是以戴廷沐有此稟報阮元俟將軍普福到任後會同普福將成明及戴廷沐俱行解任究訊是成明向地方官宣言有奉旨密奏事件招搖生事卽當照洩漏密旨之例嚴參治罪嗣將軍普福等奏訊並無洩漏情事惟擅用

驛遞部議降二級留任

耆獻類徵初編

嘉慶十七年九月乍浦副都統善英奏參將軍

桓格定期看操因參將姜希佩稟請改期遽爾
回省且戰船損壞該參將等借用同安船頂補
桓格匿不參奏

上命閩浙總督鍾祥閱兵時詳查十八年五月鍾祥覆
奏桓格看水操時參將稟報風勢不順是以未
演值省城鄉試並滿營軍政故先回省又據桓
格稱善英兩次函復先稱親驗戰船五隻俱已
損壞後祇稱一隻損壞先後兩歧奉

上諭桓格閱兵該參將稟報海面風霧何難親往察看
輒卽回省殊屬非是善英兩覆亦係該將軍失察致

誤桓格著交部議處善英明知戰船頂補當時並不舉發事後輒以究出爲辭有心朦混著開缺回旗聽候部議尋議善英革職桓格降一級留任先是善英劾桓格揀選佐領不擬正陪並令防禦勒爾經阿等呈遞告病

上命桓格明白回奏桓格奏稱考驗防禦勒爾經阿定興慶玉三員弓馬輟弱本應會參因念年歲尙健是以從寬令其呈退俾知警懼練習詎意善英誤會欲倒填月日辦理與例不符故再給咨限兩月學習奉

上諭該防禦如果弓馬輒弱自應據實奏參似此勒令
告病開缺難保必無私弊桓格卽著來京候旨九月
奉

上諭據值年旗奏該處防禦五員除慶玉業經病故其
穆精額勒爾經阿定興貴福等四員已遵旨來京著
派潘世恩交紀文慶將該四員弓馬覈實考驗秉公
覆奏卽傳到桓格善英在旁看視旋據大學士潘世
恩等覆奏該四員弓馬雖不出眾亦尙不生疏
桓格因佐領一缺留俟擬陪之防禦穆精額坐
補與例相符迨善英商令倒填月日該將軍咨

駁並限兩月練習亦無不合惟考驗時卽因該員弓馬軟弱卽應奏參乃飭令告病究屬非是奉

上諭本日又據鍾祥將閱過浙江旗營中箭數目開單呈覽該防禦勒爾經額定興馬步箭各中箭二枝尙不致廢棄何以率令具呈告退桓格著交部嚴加議處部議降四級調用加

恩改爲降二級調用

旨獻類徵初編

王翊旣被執論辟遣一女年十三許嫁黃宗義子百家以例沒入勳貴家遂爲杭州將軍部下

參領某君所養參領憐其爲忠臣女撫之如所
生而女亦相親依逾時參領欲爲擇婿有劉弁
者求之女不可參領難之女乃突出不意拔佩
劍自刎參領大驚高其義卽以劍殉之葬臨平

山中

南疆
釋史

將軍圖公以會稽陳君士炎爲賢走使以幣聘
之士炎辭圖公又以爲請士炎自往將軍所請
曰將軍不以士炎爲不肖使當書記之任士炎
聞今日書記博叢借神因鬼謁帝其惡無不爲
使將軍之過日彰者書記之事也士炎不肖有

先人之敝廬足以居有負郭之二頃足以耕土
炎不敢當公無所辱命於是將軍之客進語將
軍曰客誠賢人也吾嘗見將軍之客者始卽操
多金以呈身於甲卒使得引見旣得見則蛇行
匍匐叩頭乞哀求隸門下未見有陳君之面言
其非者客誠賢人也將軍幸勿失此人將軍曰
諾往請之曰某知過矣請從君之言乎與將軍
約一曰使兵自爲兵民自爲民而後兵民兩可
安一曰使兵可以顧民民可以顧兵而後兵民
可無負命筆書曰某事宜行某事宜止某事宜

改某事宜小有懲創一一臚次目將軍曰公能
行某豈敢負知己乎將軍再拜曰君愛我請如
君言一時羣頌將軍爲知人

吳慶百贈
陳士炎序

巡撫趙玉麟撫浙條約康熙二十三年捐賠營
債咨文云爲旗兵契券難憑百姓罄償無力謹
酌捐賠之法以息紛訟之端事照得杭城百萬
生靈五方雜處濟濟攘攘夙稱饒庶要皆揭貨
貿販朝謀夕食外成簇錦之形實少中人之產
卽當日營債一事緯頭縷棍片語遊揚而借者
競趨如鶩便可覘其窘狀矣十餘年來各旗官

兵駐防地方兵民交與初甚相安不意自放債之後旗丁見利心粗恣意盤剝佔店折房擁妻劫女種種不堪釀成大獄干瀆

宸聰特嚴首惡之誅并責鈴束之懈各兵驕貪激禍貽玷麾壇前車之鑒可爲寒心今猶執新舊各券嘵嘵不已其論似直殊不知算債全憑券約而各兵之券皆屬轉票移舊翻新票前之利已多票內之本仍在未可據此以爲確驗也若使執現在之票按戶而取則兩載因訟耽延時日愈久本利倍加欠債之民率多肩挑步擔雖粉

骨碎身不能清償將逃亾竄徙搶地呼天之象
有不止於昔日者矣本都院再四思維民爲

朝廷赤子固所當矜而戎伍有防衛之勞亦宜加卹
念其握票在手詎肯甘心且其中亦或有償未
足本者但索取之橫不休則無窮之害立見本
都院藉先人餘蔭薄有貲產再多方挪貸可以
量措五千金而貴將軍都統統兵蒞民仁慈素
著亦祈俯徇鄙見量捐如數共成萬金傳諭各
旗除二十一年以前票約年遠更甚者不准送
驗外其餘概令呈送將軍都統案前驗其數之

多寡儘此照分依給擲還原票在各兵應仰體
上人捐貽之意不得復想求多此後再不許盤
放不許索取違者重懲如此了局所全甚大而
小民寢食不驚咸頌將軍都統之德百世不忘
矣事關安輯兵民要著想當卽遵俯允合行咨
請又第二咨云爲照本都院下車之始因會同
貴將軍都統公衙門會審見欠債到官之張雲
卿錢順甫併被逼准折妻女之錢大功一係豆
腐生理一係水菜生理一係窮迫潛逃其鳩形
鵠面之狀惟行乞之兒溝中之孳可以比之絕

無人象傷心慘日不忍見聞以此責償粉骨莫
措一二人如此人人可知是以本都院委曲思
維不惜破產代民捐賠且懇慨捐協助永斷葛
藤以安窮民且卹介士誠屬美舉有何律例可
拘至於年遠之債皆係疊利轉票所償悉數倍
雖有契券完欠難憑杭民皆知追餘利給主之
旨含忍末言今仍責追遠年小民誰肯甘心恐追獲
者少給民者多也至查律內欠私債不過笞杖
若違禁取利官吏放債勢豪准欠強奪姦佔則
處分甚嚴本都院一片曲全苦心定蒙見諒倘

貴將軍都統以請捐之數太多未定遲疑不卽
俯允本都院當與同城院司各道極力勸募再
捐三千金共成八千金之數祈貴將軍都統仍
勉捐二千金以足萬金同襄此舉查照俵分將
原票盡行給發完結此事以仰荅

皇上委任地方至意安輯兵民之心并見文武同舟
之雅兩浙生民頂感在於世世生生矣又第三
咨云爲旗兵契券難憑等事准貴將軍副都統
移覆捐貲代民還債本將軍副都統戎行冷曹
何能有捐貲之力況律文並未開載宜照部覆

依律完結或契券有應償還有不應償還者不
難會訊等因又爲移咨事貴將軍副都統移咨
旗營底棍等事案內錢債未經照律完結相應
列單咨請示覆遵行緣由各到院准此爲照營
債一事本都院實軫念逐末窮民粉骨難償故
兩以捐賠咨請而貴將軍副都統回示以戎行
冷曹捐賠無力然本都院蒞任以來飲冰茹檠
更爲清苦此貴將軍副都統及杭民所深知所
云變產代償實出真情今當立即遣人回滇措
處但往返二萬里行程并措辦約須八箇月方

能得到期在明年之夏俟到另行咨請貴將軍
副都統一併確查實數代償完結萬民感德爲
此合咨貴將軍副都統煩請查照施行

康熙仁和縣志隨行杭州府會同旗員從公請
算償給檄下之日知府馬如龍卽榜示通衢先
令欠債民人自陳某年月日借銀完欠之數後
取券查對以核虛實兵皆懾服民不敢欺
武林
乍浦備志薩將軍爾哈岱宦績將軍於雍正八
年由江甯駐防防禦調陞乍浦佐領節廉勁正
不可干以私自位偏裨矯矯不與儕偶伍或訕

笑之不顧也十二年陞協領擢本營副都統先是爲卒伍時隨征西藏有功故遷轉甚速旣之任朝夕勤訓練嚴約束與將弁士卒言諄諄勛以廉恥或麗於法懲治無稍貸性能飲始服官卽自爲節制及受專閫寄曰吾兵之或至很鬪者酒也其技擊不精身家不給者亦酒也欲嚴禁之不可不身先之遂絕酒自以生長軍中未嘗通漢文公餘整襟危坐筆帖式及屬弁中稍有知書史者時引與揖讓俾講論古名臣大略居官九年遷浙江將軍

乍浦備志圖副都統克善官績乾隆二十二年
甫至乍浦任適將軍秋期來視師乍營參將助
供億資公愕然曰何與若事旣而俯首爲沈吟
狀留數金餘悉卻參將喜越明日將軍去以衣
物付質庫還所留金參將驚爲同官道之于是
羣以爲帥臣中之軒輓海瑞也好讀書旦夕誦
經史不輟亦偶釋老家言惟屏詩詞歌賦弗觀
曰是無益于身心政事者持身嚴肅在內署盛
暑必冠帶衣多疏布妻女化之未嘗服紈綺
善泰自杭州移駐乍浦紀事詩中原無戰伐

聖德應簫韶

哲后欽垂拱蒼生戴

本朝承平添武備相度走星輅喜氣三春雨軍聲
半夜潮營開新壁壘岸泊舊旌旄雪意西山嶼
霜風六里橋長懷磐石固坐使海氛消金鼓連
天震波濤入望遙南溟飛艦舳北斗繕招搖有
備眞無患葵心向

帝堯

善泰海操詩海不揚波幾十秋樓船安穩駕春
流礮聲殷地三山動何處長鯨敢出頭

于東景滿洲水操詩細柳新開大將營時清軍
令倍分明春城二月東風裏鸚鵡螺吹凱唱聲
八旗子弟好身手破敵弓刀說析津海上軍容
船若馬誰云絕技屬吳人

薩芝軒都統嘉慶中涖杭最久喜吟詠年七十
三時有自壽詩學士文人多和作臨海蔣履和
元韻云賢侯健筆走蛟蛇人健於詩齒正加祝
嘏寵光分玉食趨

朝劒佩拂霜華喜聞橐橐筵迎鶴未厭蕭蕭鬢學
鴉回首仙籌添海屋百齡半畝足生涯名園真

似徑開三織字弓衣綵筆簪

北闕春光長共被南華秋水好時參登龍先渥芝蘭
味埽榻應多風月譚司鑰者誰休謝客敞關同
付一林嵐

朱文藻朗齋先生遺集雙調絃歌序云駐防營
人蘇老五者能左手按三絃右手撥琵琶調合
而聲圓絕技也嘗至京師貴人試其技予金不
受傲然而歸余聽於湖心亭上作詩紀之湖心
晴湖水清颯然風雨來縱橫虛亭有客調絃聲
三絃在左琵琶右宮商指下均琤琤一人兼兩

藝何須洗耳琵琶箏

皇朝治定歌承平挽疆不藉左右肱防守餘暇寸技
成都門更有廉介名不惜博取資斧盈年來買
文嗟無羸蘇君對爾愧汗生

徐熊飛丙寅春午浦軍中作戎幕雜詩春潮突
海門設險自前古城中復置城屯此千貔虎大
旗從風翻軍聲壯鼙鼓飛鳥絕無聲轅門森百
羽將軍善撫循士卒同甘苦兵威一以振喜氣
溢行伍單車按壘行慙慙經險阻塘上擁弓刀
塘下集樓櫓

其茲鄉雖一隅勢扼東西浙前朝

征戰場海水尙嗚咽百年弛張境雲帆集商舶
譏察一以疏姦宄時竊發峩峩天際山中有豺
虎穴思患不豫防臨事空憤切努力峭黃盤莫
使邊備缺其二旗門鼓角喧東南羽書至云有綠
頭船出沒波濤際健跳莽烽煙桑洲嚴戒備汪
洋魚龍窟漁樵雜真僞內盜而外民餓糧相接
濟吾聞翦長鯨謀成力斯制盍收閒謀功先斷
連雞勢其三潮來榮薺門直撼西山觜高岡爭地
勢突兀建營壘百夫踞一屯登陴俯流水當關
鐵礮排霆霓波濤裏東連獨樹營西控雅山趾

三軍此犄角中藏萬家市莫恃鐵板沙雲帆疾

於矢其紅旗報水平滕衝絕壁下水師身手輕

使船如使馬初爲魚麗陣凌波勢嫺雅礮火倏

驚飛鷺鶴翔原野由來精練卒不在眾與寡出

洋風送帆旋旆雨飄瓦嚴城資捍衛雞犬靖里

社春汛肅邊防濤聲屋頭瀉其我本山中人年

年客江浦今來驃騎營戎旂側袁虎將軍能揖

客脫略忘簪組玉帳偃牙旗談兵色飛舞夜來

海聲高嚴城急鉦鼓仰看貪狼星芒角射窗戶

時聞崙山賊倏忽馳風雨氛祲幾時消憂心感

媛潔身玉井中死爲諸烈先二女牽衣從九淵
相婉變瓶沈股蟄雷甕敝激飛電碧血射潛魴
璇源暗回漩賊羣不敢汲上帝可用薦太陰開
水府精靈聚一片娥月印晶皎女星綴光燭昭
昭此圓淳千秋表海甸

赫藕香儀曹顏所居白華吟館貴鏡泉成嘗集
白華館小飲和詩云閉戶謝塵俗芳筵選客開
偶然招舊友特地試新醅笑我三蕉量輸君八
斗才仙源何處是可許問津來不禁望洋感今
方愜素心高談嗤薄俗下筆抵兼金花好園纔

植詩成客許吟居然容入座我愧列朋簪又有
偕文冠梅瑞文仲蓮慧過怡花館看新竹詩云
幽齋結伴喜重經一片清陰拂滿庭雨後筍抽
新樣碧風前籜解舊時青虛心似爾纔佳士勝
友如雲少白丁未識放梢深夜裏幾回好夢打
窗醒

靈石山房詩草題詠圖冊如祿縵亭慶柳村小
隱圖喀清堂朗春宵聽雨冊餘豐農慶寒與梅
花同不睡圖自鋤明月種梅花圖文仲蓮慧秋
宵橫笛圖文冠梅瑞西溪漁隱圖皆有關掌故

固蓮溪都統奉

旨祭禹陵公弟豐農子詩隨侍貴鏡泉成送之以詩
丹詔下杭州將軍奉

命游替拈香一炷爲祝聖千秋禹廟瞻遺像山靈認
故侯西風今日利特地送行舟昔時王會地得
意此登臨曲水無觴泛蘭亭有跡尋況攜賢子
弟應得暢行吟我獨輸羣彥山陰聽鼓琴時隨
員文仲蓮諸君皆從行

雙就園都護成義馬圖沈文忠公兆霖題云安
西都護乘黃驄提戈轉戰長淮東從營九村正

解甲謀報賊至如屯蜂飛埃漲天馬驚逝賊賞
權奇利生致肉駿直豎方瞳瞋蹠齧不教輕控
制迫騎合圍不戟森馬能縻賊賊就擒道旁觀
者識馬主曾見驄轡馳欻欻歸來兀立旌門下
悲喘騎嘶汗流赭材官騎士列帳前與人心
視此馬于今河北煙塵銷都護戰功凌煙高功
成此馬實終始寫圖聊用酬勳勞瑞文端公常
題云從戎數載身康強乘來鐵騎誇龍驤銜枚
疾走厯星霜披堅執銳摧機槍初出秦關道阻
長旋淞臨淮復汴梁都護督戰賊膽亡柳營鸞

佩鳴鏗鏘烽煙滿地礮礮磅每戰必克神飛揚
一旦衝陣折絲繯塞翁失馬心徬徨悍賊得之
凶饑張馬乃揚鬣奔如騷曳賊歸營何恩怙恢
恢大網布太荒一經品題聲價昂雲屯萬里難
頡頏移時凱唱東歸袞三軍挾纊餽壺漿

上念勞勩錫恩光君將攬轡還餘杭主人愛馬繪圖
藏偉然功績銘太常時公由甯夏將軍將還杭
駐防旗以軍功

予食半俸述職入都出此圖徵題詠文端公又贈詩
云別經十稔客魂銷萍水重逢興更饒矍鑠精

神誇馬援騰驥魄力似票姚頭銜昨日權專閫
血戰當時歷眾僚漫道鬢霜如此白好留晚節
等松喬

萬花農以大挑知縣出宰江西萍鄉到任後賊
氛甚熾籌辦團練始舉紳民粗有就緒賊猝
至不及防城陷乃以所辦鄉團克復縣城大吏
遽劾之鐫職文端公惜之有詩云君本一書生
作宰到萍鄉孤單弔形影骨氣多軒昂當其初
捧檄賊已擾豫章君仗忠義惻不肯山林藏決
計蒞斯土視民真如傷下車約紳士禦侮籌良

方多募鄉兵至銳意掃欃槍誰知彈丸地梟獍
來猖狂殺賊未洩恨蔽野皆尸僵城破膽未破
旋即復我疆功過本可抵詎料事改常大吏乃
參劾勢如雪沃湯謂君才識短不足繫民望遽
爾遂褫職我聞心彷徨與君共蘭譜三十餘星
霜盼君筮仕日得爲邦家光可憐命途舛半路
風波揚干戈徧郊野何時東歸裝煢煢妻孥輩
千里如荒詩成口欲噤涕淚沾衣裳

文秀書乍浦驍騎校該爾杭阿碑後詩驍騎手
持北門筦豕突狼奔眾星散海隅飛礮動天來

羣策倉黃無一展矢死靡他大節操一腔熱血
韡中刀先人獨上無鞍馬怒拂弓衣短後袍長
圍衝突出復沒十盪十決皆欲裂一夫叱咤空
萬人矢竭弓摧鼓聲絕孤城斗大戰血多身膺
百創猶提戈穿齧嚼齒無窮恨帶入黃泉總不
磨公道人閒心不死丈六貞珉曳繩起統軍都
護爲表彰

皇朝激勸從公始入祀昭忠子襲封哈哈卹典承
恩醴借懲惜死偷生輩豈獨區區禦侮功我亦長白
莽男子太息碑前不能已

國家養士盡如此何患甲兵今未洗

海甯吳槌書果佐領仁佈妻塔喇氏死節事
詩食君之祿忠君事烈丈夫乃有此志臨危慷
慨竟捐生巾幗亦能明大義二女隨亡更慘傷
委身玉井骨生香煌煌

天語榮褒卹雨露

恩霑日月光又洪侍御昌燕詩人臣死國婦死夫綱
常萬古昭寰區恭人慷慨識大義死節特與常
人殊壬寅之歲海氛急直犯禾中巨艘集夫君
官禾誓殺賊觀山灣前一軍立寇由閒道忽登

城礮石齊發屋瓦鳴腐奔鼠竄闔城出恭人激
烈忘其生盈盈井水清無滓玉抱冰心本如此
夫君存歿未可知二女相將一時死無何寇退
夫君歸瀾翻不起心傷悲佳城卓立輓轡側煌
煌

綸綍生光輝嗚呼恭人非有守土責死以報夫兼報
國墓門綽楔表清風下視鬚眉無愧色

兩浙輜軒續錄色布星額杭州駐防滿洲鑲黃
旗人官至荊州副都統北征五古詩北征良苦
役鞅掌勞晨暮驅車方櫛風觸熱更沐雨習聞

氣候殊仲春尙寒迺今來逢上巳炎蒸若端午
僕馬亦勞止日斜謀所駐悲哉故鄉月復照關
山路

傑果毅公懷舊詩五首蓋倣五君詠也一王東
冷漢軍人協領王度之裔游幕四方善書墨盡
千石螺竹盡萬山紙謹守梁頻羅一滴乳入水
劒器舞公孫變化獨奇詭一懷吳鳳池鑲黃旗
人善畫學李如梓人物其雲龍尤妙奇逸雲中
龍見首不見尾遐哉鳳池子望之風儀偉此筆信
有師天神與牛鬼一懷梁得楞漢軍人精於圍

棋裁汰後游大江南北以棋雄於時行方守一局神圓下一子此卽餬口謀何必在鄉里仰視周天星莫鄙小技耳一懷單武正藍旗人居太學街爲人性豪爽精於琵琶飲酒藝梅菊亦能畫學楊半嶺得其傳雨雲翻覆手人稱琵琶仙迴腸而蕩氣四條清冷泣凌人獨豪邁斗酒雙螯肩一懷白慶齋鑲黃旗人曾任蒙古協領習六壬老而好釋家書猶能開十石弓八十歲無疾終靈棋存其文焦京兩無術六壬窮而通後世若符節逃禪香一鑪娛老弓十石

固嚙鏗爲傑果毅公季子築固園於所居善雨
人能於落成感賦四絕哉花疊石費經營賴有
知交不日成魂魄歸來應戀此可能消得故園
情負篋追隨讀禮經垂髫纔得十三齡而今共
道園林好到此翻教老淚零地傍明湖此儼居
儼然吾亦愛吾廬生前未了還山願只當林泉
樂遂初愧我身無半畝棲異年猶自走東西知
君本是蓉城主管領芳華仙侶攜原注君本石
氏

元宗室善能官京職過錫山見惠泉山水清雅

棄官隱焉善兩人能以孝廉官光祿寺丞過無錫謂與之同名同籍官亦相埒尤奇於嗜好皆然曾以詩記之成吉思臣名氏同年華五百契流風惠山泉水濃於酒我亦烹椽友結紅

西凌阿乍浦重修城隍廟碑記明洪武十有九年命湯襄武王築海上大小七十二城乍浦其一也先是張士誠據吳時嘗築城崇德制甚嚴固襄武墮之移建乍浦城屹然爲瀕海雄鎮及襄武薨民奉爲城隍之神立廟崇祀示不忘也嘉靖三十二年五月倭躡浙西由海鹽陷乍浦

大肆屠戮民有匿池葦中者見神率兵衛從廟
門出羣倭羅拜遁去其禦大災捍大患有功於
民又如此廟在城東門內自明以來屢經修建
嘉慶十九年里中紳士復葺而新之增開飭墉
丹碧照耀庭階堂寢神儀列從罔不輝煥視舊
制更崇且麗祀神之禮斯爲大備矣我

國家防海綦嚴於城中添設滿營分駐八旗勁旅
余奉

命來此值洋氛充斥羽檄交馳於道甯波上海之閒
其民一日數驚莫或遑處而乍浦風濤息靜商

旅安堵如常蓋非靈爽默佑不至此繼自今氛
祲不生而水旱無患神之惠詎有極乎城隍之
神郡邑所同祀願或傳會緣飾妄指其姓名以
眩世此獨原板築所由始以報襄武之功其於
事也不誣其於禮也有敘誠足光昭祀典也已
是役經商土著之民咸相率輸助國學生劉潮
敖煜路守管徐光煥等實司其事計土木工匠
之費銀若干兩於仲春二月經始至六月落成
屬余爲文勒諸麗牲之石並係以神弦之歌曰
鐵券兮金符飛乘黃兮巡海隅堅城兮石階扼

雄關兮控南土芳菲菲兮森木稠運指畫兮升
崇邱霓旌兮電馬贈鯨鯢兮大旗下山翠兮娟
娟溪瀨兮潺湲憺猶夷兮煙浦颯靈風兮隕秋
雨魚龍若兮波不揚颺颺息兮禾黍薌緹瑤瑟
兮坎壈鼓永保民兮長樂康嘉慶十九年甲戌

仲秋月

年滿
備志

觀成憶兒時哀辭憶兒時羣兒戲羣兒有父遺
餅餌歸問母與嫂吾父在何地母泣未言嫂亦
淚解母曰嚙爾兄總角失所恃十五娶汝嫂中
饋出一指兄能三餘讀父書泥金甫捷芳蘭枯

爾嫫血淚紅高堂痛有翁

二解掩唬痕慰鰥獨庭

弄奉甘旨房中飯脫粟徽冷無弦琴泣涕請重

續一片血誠翁感孚孀婦爲翁迎新姑

三解吾入

爾門來一見心相契禮在別姑媳情親宛姒娣

問長孰爲長媳少姑一歲

四解期弄璋偏弄瓦瓦

聲呱呱驚散盈庭來賀者爾父吞聲哭爾姈咲

可羽思飯得粥終勝枵腹婆娑有花朵轉瞬看

結長生果

五解

爾父繼生爾手顫心沖沖焚香荅

上蒼炷插香鑪中有子可望繼吾宗成名那計

見當躬乳兒肌膚赤老父頭顱白

六解明年一病

入膏盲嬌兒嬉笑暝枕旁呀呀抱父如抱孃不

知病父中心傷永訣惟爭頃刻光七解吾延殘喘

忍不死只爲汝肉一塊耳淚珠何物差堪擬雨

注梅時冰結霜裏千里湘江水八解姑媳茶蓼撫

汝襁褓年年曬書望汝學飽撫孤多撫叔少無

叔求叔得叔撫叔而尤少之少苗秀而實宜本

葆儻無催耕何有晚稻昔有韓侍郎爲媛期絜

縞今有胡觀察雲坡爲媛陳疏稿汝若能得五

花封謹乞

殊恩馳汝媛親恩固爲恩媛恩亦非杪九解

盛元怡園詩草題王依氏節孝傳後士窮見節
義斯言豈欺我女子有士行丰裁尤磊砢節婦
氏王依傷哉遭奇禍夫死尙無子徇身知不可
姑死只一翁白髮嗟坎珂節婦事乃翁悽悽淚
交墮不爲似續謀安得先靈妥翁憐節婦志負
子學螺贏節婦意獨否欲語轉愴然螟蛉雖可
託何如一脈延登堂長跼請願翁重續絃善人
必有後理可質諸天翁曰非我意節婦請益堅
血忱翁意感新姑迎堂前姑媳年相若侍奉禮
莫愆焚香常默禱只願瓜瓞綿惟天佑節婦庭

蘭昌厥後有叔斯有子苦衷真不負叔生翁又
逝養姑情更厚撫叔助乃姑成人良非偶吾慕
節婦節鐵石堅同論吾慕節婦孝織紉佐盤飧
吾慕節婦智葛藟重本根吾慕節婦慈撫叔比
親恩昊蒼報之福嘉慶集其門無後今有後繩
繩宜子孫幽光久必發奇行達

帝閭

旌表榮千古豈徒示後昆

貴筑張曰最節孝王依孺人傳孺人故滿洲瓜
勒嘉氏節齋公之子名圖幹怡納字廷玉之妻

今四川南川尹觀君葦杭之嫂也葦杭早失怙其居官尙清節余意其得於母訓者深葦杭輒謂佐母教以成立者多出於其嫂因悼歎於其嫂之未食其報而見背已久也出其哀詞示余余見孺人之行有大過人者爰爲之傳孺人出王依氏王依故長白世族也孺人幼明大義聞父兄言古純臣孝子義士節婦事輒志於心不忘年十二歸廷玉公姑早卒祖姑及鰥翁在其夫爲瓜勒嘉氏獨子習

國書孺人奉祖姑及翁盡婦職家貧以織紵佐菽

水其夫銳志進取積勞成疾考中書筆政未補
官而歿年二十有五孺人時年二十有二無子
祖姑先其夫卒堂上一翁室中一婦瓜勒嘉氏
之緒將於是絕翁憫孺人苦節謀以族人子爲
之後孺人長跪請曰孝莫大於有後願爲後者
必一脈相承撫他人子終非骨肉不足奉大宗
願翁娶後姑延似續翁家累仁厚天不絕瓜勒
嘉氏必將有子庶一脈傳於勿替而祖宗靈爽
以安翁方傷其子固卻之孺人請益堅乃從其
請娶繼室生子觀成成生七月而翁歿孺人哀

其姑少寡奉養有加而解其憂者備至躬操作
給衣食助其姑撫孤嘗指成謂姑曰瓜勒嘉氏
世樹德他日縣宗祀而充門閭者於是乎在蓋
深幸其翁之有子以爲姑慰也成少長勸以讀
書明義理成年二十爲郡諸生二十七舉於鄉
家貧如故孺人操作亦如故初孺人因勞得腫
疾不忍自逸事輒代其姑庚辰夏成有子而殤
孺人悲感疾益漸數月卒年五十有四其姑慟
謂成曰汝亦知吾之爲汝家婦而生汝後瓜勒
嘉氏者事悉由汝嫂乎今死矣欲報之德嗟何

及矣成既厚葬孺人復以節孝請于

朝坊表墓門而命其子鳳瑞承兄祧以奠孺人之
靈於地下余惟曲成孝義婦孺所難孺人懼瓜
勒嘉氏之緒中墜而爲似續卒成其志其誠殆
通於天矣孺人無後而有後也宜哉贊曰撫他
人子與所生異翁而宜子惟天所置此老成之
至計何孺人而若是智語云有志者事竟成蓋
瓜勒嘉氏世受其賜而適以完孺人之志

城西古蹟考順治間營中有白曉月乙巳二月
二十六日遊半山憩尼庵題壁七絕云萬種憂

愁訴與誰對人強笑背人悲此詩莫等尋常看
一字吟成千淚垂色他夫人和韻三首其序略
云初姊距妾家不數武得朝夕聚感觸成詩輒
以相示戊戌姊以中秋對月作索和中有邊塞
征人意深閨思姊情妾亦有物隨秋漸老人與
月同孤句越明年渠良人遠戌今年夏妾六子
亦從軍徂閩錦帳生寒一窗蕭瑟中秋對月句
斯其識歟今讀壁間韻不禁泣數行下云云曉
月重過次韻序略云庚子主人遠戌黯然銷魂
今春二月主婦疽患甚劇邀福於半山神祠復

過茲庵固山夫人色他哈踵韻心契云云

案柳絮集

作李繼題德州驛壁
宋入續輶軒錄未詳